

Na 2017 Dienst Warenkeuring en Hygiene lo diversifica nan tareanan di un forma mas specifico



ORANJESTAD - Fin di aña 2016 ta yegando caba, pero kico a nifica e aña aki pa departamento di Higiene conoci awor como Dienst Warenkeuring en Hygiene. E adaptacion di nomber aki ta muestra caba e caminda cu nan ta bay traha arduamente: Inspeccion di Alimento.

Pero segun directora di e departamento aki, sra. Yvette Geerman nan obhetivo ta keda e parti di higiena. E ta bisa Bon Dia Aruba cu e aña aki tabatin su retonan pa nan.

2016 a bay practicamente bon, ya cu nan a cuminsa nota cu nos comunidad a bira mucho mas critico, ya cu nan ta wak e importancia relaciona cu e parti di higiena, pero tambe riba e parti di cuminda y e calidad di cuminda.

“Esey lo cual nos enfoke ta entre otro pa bira critico y e consumido wak e importancia. Y esun cu ta prepara e cuminda tambe por wak e rol cu nos como departamento tin den e comunidad, pa nos por proteha e pueblo di Aruba.” E aña aki nan a

realisa diferente accionnan y nan ta mira mehoracion riba e tereno aki; pero te ainda nan no a yega unda nan kier yega riba e parti di calidad di e cuminda cu ta wordo ofreci na comunidad. Tambe 2016 tabata un aña special pa nan pasobra e departamento di Higiene a celebra su 80 aña di existencia.

Retonan di 2017

Pa 2017 sra. Geerman a indica cu nan tin retonan hopi grandi; ya cu nan tin cu restructura e departamento manera mester ta. Nan tin cu

diversifica nan tareanan di un forma mas specifico. Igualmente nan kier estrecha mas ainda nan lasonan internacional pa nan por yega na e nivel unda nan kier yega. Como departamento nan kier expresa nan mas sincero deseo na pueblo di Aruba pa crea un ambiente di paz den e fin di aña aki. “Hopi bendi-

cion specialmente hopi salud y e importancia ta pa e parti di higiena keda hunga un rol den cada hogar di e pueblo di Aruba.”

Igualmente e ta sugeri pa tur hende bira mas prudente ora di come; ya cu nan no kier pa niun hende bira malo specialmente den e dianan di fiesta aki.

